

Թում դէմը: Եւ ահա մի անգամ, Նաւասարդի տօներին Գնէլին իր մօտ կանչելու եւ սպանելու ծրագիր մշակեց Արշակ Թագաւորը», ասում է պատմիչը: Ու արքան մարդ է դրկում Գնէլի յետեւից, որ կնոջ եւ անեղինների հետ միասին Թագաւորի բանակատեղին երթայ, խնճոյքի թէ՛ «Արշակ Թագաւորը չի՛ կամենում Նաւասարդեան տօները առանց քեզ անց կացնել...» (Գ. 15):

Այս եւ ուրիշ հատուածներ Փաւստոսի պատմութեան մէջ՝ մի-մի անգին նիւթեր են Հայ Ազգազրութեան պատմութեան համար: Նոյնչափ կարեւոր նշանակութիւն ունին նաեւ պատմական այն բաղմամբիւ առասպելները եւ ավանդավէպերը, որ պահել է մեզ Փաւստոս Բուզանդ՝ մի շարք հայ քաջարի իշխանների եւ յատկապէս Մամիկոնեան տոհմին պատկանող մի քանի հերոս զօրավարների, այլ և եկեղեցական ծանօթ դէմքերի մասին:

Այդ բոլոր գրոյցները Փաւստոսի օրով անշուշտ պատմում էին ժողովուրդի մէջ: Եւ առհասարակ, մեր պատմիչի երկի կենդրոնում կանգնած են մի կողմից Մամիկոնեան տոհմի ներկայացուցիչները իբրեւ Արշակունեաց տան ամուր յենարաններ, իսկ միւս կողմից՝ Լուսաւորչի տոհմը: Առաջինի կենդրոնական դէմքերն են՝ Վասակ, Մուշեղ եւ Մանուէլ զօրավարները, իսկ Լուսաւորչի տոհմինը՝ Ներսէս Պարթեւր: Ինչպէս դոցա բոլորի — նաեւ ուրիշների — այնպէս եւ Արշակ Թագաւորի անուանց շուրջը հայ ժողովուրդը գեղեցիկ գրոյցներ է հիւսած եղել, իբրեւ իր սիրած հերոսների: Եւ եթէ Փաւստոս եւ մեր միւս պատմագիրները հայ հեթանոսական շրջանից եկող վիպական պատմութեանը եւ գուսանական երգերը փրցուն, անմիտ բաներ են համարում, վստահութեան ո՛չ արժանի, դորա փոխարէն՝ հալած իւղի տեղ են դնում քրիստոնէական շրջանից եկող ժողովրդական գրոյցները, եւ այդ ամէնը իբրեւ զուտ պատմութիւն ավանդում գալոց սերունդներին:

Ո՛րչափ յուզիչ, միեւնոյն ժամանակ ո՛րչափ խրատական է այն գրոյցը, որ հայ ժողովուրդը հիւսել է դժբախտ Արշակ Բ. քաղաւորի շուրջը: Իր եւ իր յաջորդների օրով՝ Հայաստան երեսնամեայ պատերազմների թատր

էր դարձած: Ընկած Արեւելքի եւ Արեւմուտքի, Պարսկաստանի եւ Բիւզանդիոնի երկանաբարի արանքը, Հայ Աշխարհը ոտքի կոխան էր — ինչպէս միշտ, դորանից առաջ եւ յետոյ — երկու աշխարհակալ պետութեանց ակերակուս բանակների համար:

«Այս երեսուն տարի է ինչ՝ մեր Արշակ Թագաւորը իշխում է, բայց մենք ոչ իսկ մէկ տարի հանգիստ ունեցանք պատերազմներից», ասում է պատմիչը (Գ. 51): Գիտակ իր եւ իր երկրի ոյժերի թուլութեան՝ հանդէպ աշխարհակալ դրացիների, Արշակ ջանք էր թափում, մերթ Տիզրանի եւ մերթ Բիւզանդիոնի վրայ յենուիլ, սեփական ինքնուրոյնութիւնը պահպանել կարենալու համար: Եւ սակայն, ոչ ինքը կատարեալ վստահութիւն ունէր մէկի կամ միւսի վրայ, ոչ էլ նոքա՝ ի՛ր վրայ:

Եւ Արշակ վերջ ի վերջոյ դո՛հ գնաց արքայից արքայ Շապուհի դաւադրութեան: Վստահելով նորա «հաւատարիմ երդման» ու Թագաւորական հաւատարացման, որի հաստատութեան համար Շապուհ հայոց Թագաւորին — համաձայն իրենց «նուիրական օրէնքին» — «իր վարապատկեր մատանիով կնքած աղ է դրկում», Արշակ իր հետեւորդների հետ միասին գնում է Տիզրոն, պարսից արքայանիստ քաղաքը:

Շապուհ «կախարդների, աստեղագէտների ու քաղեկանների» խորհուրդն է հարցնում: «Յնչառ անգամ կամեցայ սիրել Հայոց Արշակ Թագաւորին», գիժում է նոցա Շապուհ, «բայց՝ նա միշտ էլ անարգեց ինձ... Այս իրեսուն տարի է ահա, ինչ մենք, Արիացիքս, անընդհատ ճակատամարտների մէջ ենք նորա հետ, բայց՝ կարող չեղանք եւ ո՛չ մէկ տարի յաղթել նորան: Այժմ ահա, նա ինքը իր ոտով է վեր կացել ու եկել»: Եւ ուզում է կախարդներից իմանալ՝ արդեօք Արշակ այնուհետեւ՝ գոնէ հնազանդ պիտի մնա՞յ իրեն, արքայից արքային (Գ. 54):

Գաղեանները մի օր ժամանակ են խնդրում Շապուհից, պատասխան-խորհուրդի համար: Յաջորդ առաւօտը «բոլոր քաղեկանները եւ աստեղագէտները ժողովում եւ գալիս են արքայից արքայի մօտ»: Նոցա առաջին հարցը լինում է Թագաւորին.